

Unde beatus Apostolus infidelium animos increpat dicens, *Si autem Christus prædicatur quod resurrexit a mortuis, quomodo quidam dicunt in vobis, quoniam resurrectio mortuorum non est* (I Cor. xv, 12)? Hoc ergo tenete constanter et credite, quod divinis vocibus affirmatur, quia resurrectio sit futura, in qua sanctis omnibus, qui Christum diligunt et ejus faciunt voluntatem, immortalitas gloriosa donanda est, ut in conspectu Dei cum Angelis et cœlestibus Virtutibus in perpetuum gloriantur: infideles vero et peccatores, et qui Dei præcepta non faciunt, ad hoc resurgere, ut immortalis eorum facta caro æternis incendiis deputetur; ut semper ardeat, et nunquam ardendo deficiat. Hoc enim et Domini nostri Jesu Christi sermo testatur, qui in Evangelio de peccatoribus pronuntiavit, *Tunc ibunt impii in supplicium æternum, justi autem in vita æternam* (Matth. xxv, 46).

Hæc sunt autem quæ huc usque diximus. (a) Postquam vos credere promisistis, tertio capita vestra in sacro fonte demersimus. Qui ordo Baptismatis duplici mysterii significatione celebratur. Recte enim tertio mersi estis, qui accepistis Baptismum in nomine Trinitatis. Recte tertio mersi estis, qui accepistis Baptismum in nomine Jesu Christi, qui tertio die resurrexit a mortuis. Illa enim tertio repetita demersio typum dominicæ exprimit sepulturæ; per quam Christo consepulti estis in Baptismo, et cum Christo

(a) Ivo de Baptismo, cap. 194.

resurrexistis in fide, ut peccatis abluti in sanctitate virtutum Christum imitando vivatis. Unde beatus Apostolus ait, *An ignoratis quoniam quicumque baptizati sumus in Christo Jesu, in morte ipsius baptizati sumus? Consepulti enim sumus cum illo per Baptismum in mortem, ut quomodo surrexit Christus ex mortuis per gloriam Patris, ita et nos in novitate vitæ ambulemus. Si enim complantati facti sumus similitudini mortis ejus, simul et resurrectionis erimus; hoc scientes quia vetus homo noster simul crucifixus est, ut destruamus corpus peccati, ut ultra non serviamus peccato* (Rom. vi, 3-6). Considerate, fratres charissimi, qua conditione Apostolus esse dixerit baptizatos. *Ut ultra, inquit, non serviamus peccato*. Quæ enim tanta est non dico negligentia, sed amentia, cum per Baptismum acceperis remissionem peccatorum; obligari velle peccatis; ut qui factus fueras ex peccatore sanctus, rursus ex sancto velis esse peccator; et post sacrum illum fontem, quem non nisi semel abluere licet, iterum ad vitiorum sordes reverti? Attendite ergo, dilectissimi, ut quod accepistis, quod jam ulterius a vobis accipi non potest, usque ad finem integrum immaculatumque servetis; et semel effecti absque peccato, in perpetuo a peccatis omnibus recedatis. Christus enim, qui vos pollutos a diabolica suasionem sordidatos sua miseratione mundavit, non vult mundatos iterum sordidari. Huic gloria et honor cum Patre et Spiritu sancto in sæcula sæculorum. Amen.

SERMO

DE UNCTIONE CAPITIS, ET DE PEDIBUS LAVANDIS.

In baptizatis chrismatis infusio quid significet. Ut promissa in Baptismo sedulo impleantur.

Huc usque de mysteriis locuti sumus, quæ vel ante Baptismatis sacramentum, vel in ipso Baptismate celebrantur: nunc vero de his acturi sumus, quæ iam baptizatis sancta institutione complentur. Impleto enim Baptismate caput vestrum chrismate, id est, oleo sanctificationis infundimus: per quod ostenditur, baptizatis regalem et sacerdotalem conferri a Domino dignitatem. Nam in Veteri Testamento hi qui legebantur in sacerdotio vel in regno, sancto ungebantur oleo: et unctione capitis alii regnandi in populo Dei, alii sacrificia offerendi accipiebant a Domino potestatem. Sicut sanctum David, et cæteros reges unctos legimus a Prophetis, et de privatis in reges olei sanctificatione mutatos: sic et sanctum Aaron a Moyse unctum legimus, ex laico in sacerdotem Domini sancto oleo consecratum. Unde et in Psalmo canitur, *Sicut unguentum in capite, quod descendit in barbam, barbam Aaron* (Psal. cxxxii, 2). Sed illud in Veteri Testamento oleum, temporale regnum, temporale sacerdotium conferebat; in hac enim vita erat administrandum, quæ paucorum annorum curriculo terminatur: hoc autem chrisma, id est, hæc unctio quæ vobis imposita est, illius vobis regni, illius sacerdotii contulit dignitatem, quod cum semel collatum fuerit, nunquam est finiendum: Miramini forte quod diximus vos illo chrismate regnum futuræ gloriæ et sacerdotium consecutos. Non ego vobis, sed apostolus Petrus, imo per Apostolum Christus, collatam hanc pronuntiat dignitatem. Sic enim loquitur ad fideles, id est, qui Baptismate abluti et chrismate consecrati sunt: *Vos autem genus regale et sacerdotale, gens sancta, populus acquisitionis; ut virtutes annuntietis ejus, qui de tenebris vos vocavit in admirabile lumen suum* (I Petr. ii, 9). Considerate ergo honorem quem in illo estis mysterio consecuti, et cavete ne forte qui post peccata per Baptismum filii regni facti estis, rursus peccando, quod absit, velitis effici filii gehennæ.

¹ Ivo de Baptismo, cap. 193, quæ per sacramentum in ipso Baptismate, etc.

Quomodo enim irasci putatis Deum, si post beneficia ejus, post indulgentiam peccatorum, velitis ad peccandum reverti; et qui adoptati estis in Dei filios, iterum quasi servi contemnentes Deum, velitis facere diaboli voluntatem?

Impletis autem omnibus sacramentis, etiam mandatum vobis et exemplo et sermone tradidimus. Lavimus enim singulorum pedes (a), ad imitationem vos nostram, imò ipsius Domini et Salvatoris nostri, provocantes, ut quemadmodum nos vestros pedes lavimus, ita etiam vos pedes fratrum et hospitem lavare debeatis; non solum hospitales vos esse doceamus, sed etiam humiliter hospites ita honorantes quos in vestra suscepistis hospitia, ut erga eos servorum implere non erubescatis officium. Quod si injuriosum quis putat, et diabolico inflatus timore mandatum Domini facere dedignatur: et, quamvis ille in sæculo nobilis, pauperes et in hoc mundo contemptibiles Christiani lavare pedes erubescit; qui et hoc præcepit, et fecit, imò antequam præciperet, facere dignatus est: siquidem præmisit exemplum, ut facilius commendaret imperium. Sic enim in Evangelio legimus de Domino Jesu: *Sciens, inquit, quod omnia dedit ei Pater in manus, et quia a Deo exivit et ad Deum vadit, surgit a cena, et ponit vestimenta sua; et cum accepisset linteam, præcinxit se. Deinde misit aquam in pelvim, et cepit lavare pedes discipulorum, et extergere linteo, quo erat præcinctus. Et rursus, Postquam autem lavit pedes eorum, accepit vestimenta sua; et cum recubisset iterum, dixit eis: Scitis quid fecerim vobis? Vos vocatis me, Magister et Domine, et bene dicitis; sum etenim. Si ergo ego lavi pedes vestros, Dominus et Magister, quanto magis et vos debetis alterutrum lavare pedes? Exemplum enim dedi vobis, ut quemadmodum ego facio vobis; ita et vos faciatis. Amen.*

(a) Hic ritus etiam duodecimo sæculo quibusdam in Ecclesiis servabatur, teste Hugone Vict. in Joan: 13, ubi quosdam ait velle « non remitti peccatum originale nisi in lavatione pedum post Baptismum, » et ejus rei auctorem dicere Ambrosium Mediolanensem episcopum, Cujus vide lib. de Initiandis, cap. 6.

amen dico vobis, quia non est servus major domino suo, nec apostolus major eo qui misit illum. Si hæc scitis, beati estis si feceritis ea (Joan. XIII, 5-5; 12, 17). Considerate ergo, fratres dilectissimi, cujus infelicitatis, cujus insanix sit, ut dedignetur servus conseruo, discipulus condiscipulo pedes lavare; quando omnium Dominus et magister servorum et discipulorum pedes lavare dignatus est. Ille se humiliavit inferioribus; nos vero humiliari dedignamur æqualibus et sæpe melioribus. Quod non aliunde, quam de incredulitate evenit futurorum. Si enim vere et toto animo crederemus, per hæc Domini præcepta, quæ brevi vitæ nostræ tempore custodimus, ad æterna et cœlestia nos præmia pervenire; non solum non erubesceremus omnia opera humilitatis implendo, verum etiam gloriaremur.

Commendate ergo firmiter memoriæ vestræ quod audistis a nobis, et quod nobis, imo Domino promisistis (a): nec ulla unquam tribulatio præsentis vitæ recordationem vobis vestræ auferat sponsionis. Implete omnia quæ audistis imperia: implete omnia vestra quæ promisistis. Nolite similes effici populo Judæorum, qui cum audissent præcepta Dei, recte quidem dixerunt, *Omnia quæ mandavit nobis Dominus, audiemus, et faciemus ea*; sed quod bene promiserant, neglexerunt. Placuerunt enim Deo, quando se mandata ejus servaturos promiserant. Sic quidem legimus dixisse ad Moysen populum Israël: *Accede, tu, et audi omnia quanta loquitur Dominus Deus noster ad te, et tu loqueris ad nos. Omnia quanta loquitur ad*

(a) Promissam in Baptismo pedum lotionem legimus in Appendice tomæ 5, serm. 168, n. 5, et 237, n. 2.

nos Dominus Deus noster, et audiemus, et faciemus. Et dixit ad Moysen Dominus, *Audiui vocem sermonum populi-hujus quanta locuti sunt. Quis dabit cor eorum sic esse in eis, ita ut metuant me, et observent præcepta mea omnibus diebus (Deut. v, 27-29)?* Placuerunt ergo, ut diximus, Deo, quando quidem polliciti sunt se mandata ejus esse facturos: sed displicuerunt, quando quidem posita sibi mandata, et quæ promiserant servare, transgressi sunt. De ipsis enim propheta loquitur dicens, *Dilexerunt eum in ore suo; et lingua sua mentiti sunt ei (Psal. LXVII, 36)*. Hoc est enim ore Deum et non corde diligere, quod promittunt se Dei voluntatem esse facturos, mentiuntur lingua sua, et ad faciendam diaboli refugiunt voluntatem, omnipotentem Deum ad iracundiam provocantes, qui se irrideri non patitur. Qui cum et opera hominum quamlibet in occulto facta conspiciat, qui cum verba omnia quamlibet secreto insusurrantes audiat, qui cum omnes omnium cogitationes intelligat et agnoscat, severissime judicabit. Qui hic ideo non semper contemptores suos punit, quia in futuro decrevit esse judicium, ubi æterna condemnatio et perpetua servatur peccantibus poena. *Ibi erit fletus oculorum, et stridor dentium. Ubi, sicut ipse Dominus ait: Vermis eorum non morietur, et ignis eorum non exstinguetur (Isai. LXVI, 24)*. Vos autem, fratres dilectissimi, credimus in nomine Domini, quod non transitorie audiat verba nostra, imo divina: quia quod vobis dicimus, ex sanctis et divinis eloquiis mutuamur. Speramus in Domino, quod facietis omnia quæ promisistis, Deo adjuvante vos in sanctis operibus, ipsius Domini nostri Jesu Christi gratia; cui est gloria et honor cum Patre et Spiritu sancto in sæcula sæculorum. Amen.

TRACTATUS DE CREATIONE PRIMI HOMINIS.

Apud Ambrosium inscribitur, *De dignitate primi hominis*. Apud Alcuinum autem, *Dicta beati Albini Levitæ super illud Geneseos: « Faciamus hominem ad imaginem et similitudinem nostram. »* Paulinus, Aquileiensis supra lib. de Salutaribus Documentis, capp. 2 et 3, nonnulla mutuatus est ex hoc ipso tractatu; qui præterea in libro de Spiritu et Anima, cap. 53, totus insertus est. Hic itaque prima et postrema verba dedisse sufficiat.



Tanta dignitas humanæ conditionis esse dignoscitur, ut non solum jubentis sermone, ut alia sex dierum opera, sed consilio sanctæ Trinitatis et opera majestatis divinæ creatus sit homo.... (a) Quapropter quisque diligentius attendat primæ suæ conditionis excellentiam, et venerandam sanctæ Trinitatis in se ipso imaginem agnoscat, honoremque simi-

litudinis divinæ, ad quam creatus est, nobilitate morum, exercitio virtutum, dignitate meritorum habere contendat: ut quando apparuerit qualis sit, tunc similis illi appareat, qui se mirabiliter ad suam similitudinem in primo Adam condidit, mirabilius in secundo reformavit.

(a) Omnia repete ex libro de Spiritu et anima.

SERMO DE VANITATE SÆCULI.

Habetur supra, in Eligii tractatu de Rectitudine catholicæ conversationis, nn. 21, 22 et 23, præter versus circiter decem in fine ab istis verbis, *Benedicamus igitur Dominum, etc.*

In hac vita positi, fratres, ita agite, ut cum hinc migraveritis, et caro vestra a verbis cœperit devorari in sepulcro, anima ornata bonis operibus cum sanctis omnibus lætetur in cœlis. Retrahat vos a malis operibus vel peccatis, interitus eorum quos præmisistis.... (a) Et erit tunc quanto quis amplius alio hic obediens Deo fuit, tanto ampliorem illic mercedem accipiet: quantoque hic amplius Deum amavit, tanto propius eum videbit. Benedicamus igitur Dominum Deum nostrum, fratres, qui ad lætitiâ spirituales congregavit nos. Simus in humilitate

cordis semper, et gaudium nostrum penes ipsum sit. Non de prosperitate aliqua hujus sæculi inflemur; sed noverimus felicitatem nostram non esse nisi cum ista transierint. Modo gaudium nostrum, fratres, in spe futura sit, totum desiderium vita æterna sit, omnia suspiria nostra Christo anhelent. Ille unus pulcherrimus, qui fœdos dilexit ut pulchros faceret, desideretur: ad illum unum curratur, illi ingemiscatur; et dicant semper, *Magnificetur Dominus, qui volunt pacem servi ejus (Psal. xxxiv, 27)*.

(b) Omnia repete ex Eligii tractatu de Rectitudine catholicæ conversationis.